

轉
漕
日
記

轉漕日記卷三

河間 李鈞 夢韶

三月初一日卯刻行七八里抵連鎮

仍景州地

少泊飯後又

行三十里過東光縣發家書

東光古安陵地又曰

觀州今隸河間府土城殘缺可度行人

宋劉摯邑

人官御史峭直有氣節章數十上朝貴側目神宗以

王安石亟稱之疑其從學對曰臣北人少孤獨學不

識安石也累遷尚書僕射卒以嫉惡太嚴被讒死於

竄所。安陵舊治古濠東。遙指城闕在眼中。千里舳
艫春水碧。兩行旌旆故鄉紅。芳辰倏又逢初月。里語
猶能辨土風。此去吾家真咫尺。寄書還擬託歸鴻。

又十里遇風泊油房口。

仍東
光地

余屢向榜人問程。笑曰。

此公故鄉。乃不識道里耶。感賦。我本河間人。來至

河間地。雙目却如盲。誚爲程不識。少小客長安。一官
嗟匏繫。繼乃走風塵。投筆爲外吏。歲月去堂堂。二十
餘年事。某水與某邱。曾未供游戲。華表鶴歸來。惘惘

如隔世。故園春已深。萬井足生意。麥隴午風柔。杏花
新雨霽。老農荷鋤歸。笑語無猜忌。青雲鳥倦飛。鹽車
困騏驥。不待起秋風。早動蓴鱸思。塵甑奈依然。未遂
買山計。是日清明。

初二日卯刻行。十餘里。遇雨少泊。煙水迷離。好景如畫。
霏灑約兩時許。變而爲雪。瓊英飛舞。旋落旋消。甘澤
及時。可爲粉榆誌喜。春雨賦。以雨絲風片煙波畫船爲韻客

有泛舟衛河者。鬣影張帆。雁聲曳艣。自在中流。綠波

南浦欣李郭兮舟同。怨石尤兮風阻。乃放棹於鄉關。
遇及時之好雨。水墨紛披。冷雲若癡。綠眠野樹。紅蝕
朝曦。鴨頭漲處。魚眼生時。漠漠兮濃。還作陣濛濛兮
細不成絲。四面煙籠。波光乍烘。瘦扶雙槳。涼壓一篷。
岸草凝碧。林花泣紅。聽涓涓兮泉瀉。又滑滑兮泥融。
織就水晶簾子。隔來雲母屏風。潤既塗酥。寒猶集霰。
一半飄綿。幾分垂線。倦濕林鶯。冷偎檣燕。艷霏樹杪
之花。素染波心之練。水影天光。滂成一片。乃設賓筵。

濡毫擘箋召客賞雨。願乞佳篇。則有湯君若士。胡氏
思泉。便便五經笥。桂巖邊孝先。咳天邊之珠玉。起紙
上之雲煙。若士吟曰。何處雨聲多。聲聲雜棹歌。綠蓑
青箬笠。我欲釣煙波。思泉續曰。細雨廉纖帆不挂。主
賓無事篷窗話。邀我來作畫中詩。請君細看詩中畫。
孝先於是振袂起舞。曼聲而歌曰。河之水兮清且漣。
雨復雪兮灑芳田。牙檣列兮錦纜牽。班生此行兮何
異登仙。主人曰善。酌以醕焉。凍雨初歇。餘霞在天。問

征夫以前路告舟子而拏船。申刻雨止，又行二十里，抵泊頭鎮。泊頭，巨鎮也，屬交河縣。交河，漢曰中水，金曰交河，以高河、滹沱河二水交流，故名。今隸河間府。地距吾家百里，余新婚，攜婦赴南皮省岳家，曾於此渡河，後又往來數次，今婦歿垂二十年矣。重來舊地，爲之愴然。傳過郵籤第幾籌，黃昏纔駐木蘭舟。千帆冒雨仍銜尾，一路乘風到泊頭。唱晚慣聽漁父曲，買春欲醉酒家樓。臨流忽惹鰥魚泣，銀漢

曾經渡女牛

初三日，因僕輩登岸買食物，未能早行，余與聯璧亦往一游。見有雙忠祠，不知所祀何人。扁鐫不能入，歸舟命役往訪之，乃知故明殉節刑部侍郎孟肖形及進士孟綱宜祠宇也。南皮人惜未瞻仰。已刻正欲開舟，大風起矣。傍晚移至鎮北而泊。兩日來臨前後兩幫，俱已前邁。本日遇平前幫，永司馬親押是幫過船晚飯。

初四日卯刻行十餘里。又遇大風。停泊至夕。又行二十

餘里。泊薛家窩。

仍交河地

楊柳枝詞。

碧玉粧成一樹

嬌。臨風纔解鬪纖腰。趙家飛燕分明是。漏洩春光第

五橋。

煙縷垂垂欲綻金。窺人青眼豈無心。柔條底

事難攀折。老樹濃遮一片陰。

旖旎韶光知未知。隔

牆空白蕩晴絲。流鶯來往如梭織。百轉難傳隱葉詞。

爭怪騷人欲斷腸。惱懷先唱謝秋娘。他年飛絮知

誰屬。莫使穠華委路旁。

初五日卯刻行三十里過磚河驛

地滄州

又三十里泊滄

州南關

滄州古渤海郡地又曰棣州唐宋置橫海

軍今隸天津府濱海產鹽長蘆卽其地也

地多蘆葦故名

天

津運司原駐於此現祇設監掣同知舊城在迤東四

十里明初移此我

朝設駐防營

千童故城又號

卅兮城在州東南秦始皇遣徐福發童男女千人入

海求仙因置此城麻姑城在州北漢武帝東巡至此

祀麻姑五壘城在州南河閒獻王子景成侯雍使五

子分居城中各築一壘故名。開元寺鐵獅子高一丈七尺長一丈六尺在舊城相傳周世宗北伐命罪人輸鐵鑄此以鎮蛟龍寺久廢相距甚遠不能往觀。閬州志有項行吾長歌一篇雄偉稱題讀之可代目也。地控幽薊風煙通怒猊雄踞當其衝張牙鉤爪勢如攫千載躍躍稱神工憶昔中原爭逐鹿遼人虎視燕雲北石晉搖尾前乞憐鼠拳獻圓州十六柴皇英武起大梁掃清河朔驅羣羊電掣霆擊抵橫海貔

貅十萬何騰驤。嚴疆作鎮須神物。特有國工申薄罰。
洪鑪湧出百獸王。閃爍礚砢雄威發。甫定關南運已
更。悲風獵獵回前旌。耶律五京方鼎峙。空畱巨跡猶
專城。迄今光怪騰中夕。虎豹見之皆辟易。似恨當年
功未成。怒張彫尾森矛戟。我來道左勒征鞍。金精奪
目雙眸酸。短歌長吟增歎息。髣髴欲吼西風寒。宋
包孝肅曾爲轉運使。所乘轎尙存分司署中。稱曰包
公轎。晉刁協州人。諳習故事。累官尙書左僕射。元

帝南渡制度皆所裁定。後死於王敦之難。明馬昂州人在樞部時。與冢宰王勰鹽山人均爲英宗眷注。凡有簡任。文以咨勰。武以咨昂。故所用皆得人。國朝戴明說號定園。亦州人。官至戶部尙書。工詩善書畫。少談經濟。晚通禪學。惟於前明革命之際。以科臣屈節流寇。是爲瑕玷。其子王綸。順治乙未。以第二人及第。博學多聞。能世其家。滄酒屢見前人題詠。王阮亭目之爲麻姑酒。其美可知。泊舟親往行沽。其味薄澀。

有如柿酒。蓋非家釀不能如法。非陳甯不能得味。曉嵐先生嘗論之矣。然名不可不驚。買數罍載之。畱以贈人。此去吾鄉。擊柝聞行人。繫纜又斜曛。新糧我泛運河棹。故壘今過橫海軍。萬頃蘆花生積鹵。三杯竹葉博微醺。狻猊未訪柴皇鐵。惆悵荒城隔暮雲。州別鴛鴦君。邦哲向以師禮尊余。來候並以滄酒見遣。伊年四十。其子松年已捷南宮。觀政水部矣。令人健羨。平前後兩幫。又於夜間前邁。

初六日辰刻入城回拜喬君歸舟卽行順風揚帆舟如
激箭快甚片帆倏借好風催有客憑窗倦眼開舵
尾連推雙堠去船頭遙送一村來烟波都覺含生趣
篙艣方知是鈍才從此鴻毛多遇順仙山指顧達蓬
萊三十五里過興濟故縣治也今廢居民以編草
笠爲業明孝宗后張氏興濟人午後風甚又不能進
將晡復行三十五里泊青縣青縣古爲永安宋曰
清州金曰會川今隸天津府境內有西山中山諸勝

又有峭帆亭。皆未見。何處西山展畫屏。遺蹤還問
峭帆亭。此邦果有出藍輦。繞郭垂楊一色青。任城
幫過訖。

初七日卯刻行。三十餘里。過流河驛。

仍青縣地

遇風少泊。又

三十餘里。過唐官屯。

靜海縣地

已黃昏矣。新月高揭。輕風

滿帆。又四十里。泊靜海縣。時巳子初。

靜海金爲靖

海。明改爲靜海。今隸天津府。

國朝高爾儼。邑人。由

翰林累遷吏部尙書。宏文院大學士。秉銓公正。時論

歸之勵杜訥邑人少育於杜氏蒙其姓後始歸宗以
善書供奉內廷授翰林官至刑部侍郎出入禁
闥二十餘年小心慎密前後疏奏多所建白子廷儀
孫宗萬俱由翰林起家歷官卿貳元展成亦邑人由
外任累遷巡撫有政聲余爲史官時輯其傳直隸
學使潘芸閣少司馬錫恩將於明日按試天津本日
宿此以更深未通問也徐前後兩幫又於夜間過
訖意有所觸輒書數語讓過前幫又後幫風帆

日日看人忙。天台有路終須到。捷足先登也不妨。
飯罷倚窗惟把卷。睡餘伏几又敲詩。此時雖覺無聊。
甚。難免他時憶此時。共說連朝暖異常。新衣催換。
舊衣裳。敝裘戀體休生厭。乍熱還饒數日涼。不覓。
樗蒲不着棋。算來都怕費心思。耽吟却把枯腸索。抽。
盡春蠶縷縷絲。

初八日辰刻行十餘里。抵獨流鎮。仍靜海地少泊。鎮以河得。

名。貨物甚備。其最有名者則醴也。馨烈異常。買之以

供饋餉臨河又多賣蘆席者午後又行二十餘里泊

楊柳青

天津縣地

涇渭淄澠一樣收桃花軟浪去悠悠

如何此水偏清鯁不願同流願獨流圓似傘輪撐
一柄勁如箭筈插千條北方風氣君知否楊柳雖青
不折腰

初九日辰刻行三十餘里抵天津泊北關外火神廟前

天津星躔析木之次故曰天津古爲渤海郡地明
置天津衛國朝雍正三年改衛爲州九年設府改

州爲縣並割河間所屬之靜海青縣滄州南皮鹽山
慶雲隸焉其地五方雜處俗尙奢靡衛河自西南
來曰南運河其流濁白河卽潞河自西北來曰北運
河其流清至縣東北會爲三岔河出大直沽口入海
大直沽長一百二十里謂之海河糧艘自南運河放
至三岔口溯流入北運河抵通州九河故道俱在
河間天津之交久已湮沒逆河蓋卽今之海河也遇
潮則逆行而上明于忠肅公爲御史時巡視長蘆

車江日言 卷三 一
鹺政惠民通商私梟絕跡。趁好乘槎一問津。片帆

東指大瀛濱。鼇頭紅看三山日。馬頰青連九派春。定

有鶯花娛過客。儘饒魚米叅游民。艤舟且傍垂楊岸。

擬扣烏臺訪故人。午後過河謁鍾秀峰。靈鹺使。南河

五府一州食長入城。拜天津道王執軒觀察同年。允中

運使新升江西臬司管椒軒廉訪同年。通羣新運使

文如亭都轉。綸天津府陳謙齋太守年丈。彬天津縣

李仁山明府。百齡管廉訪暨府縣已先施矣。劉總鎮

允孝

赴通州閱兵以東來周都閫

鳳岐

來拜

求司

馬晚間來見定於明日先行向夕大風而寒入夜微雨河水陡長尺許蓋潮至也

初十日。鹺使暨執軒觀察等以次來拜。鹺使將於明日赴山東巡視。芸閣學使以東來。午後赴鹺院送行。入城拜張總鎮周都閫。都閫由廣昌調此。相圃舍弟任學博時與有舊也。申刻執軒招飲。余癸巳歲述職入都。執軒官吏部郎。別來幾五載矣。傳杯叙舊。酬酢

甚歡席間食河豚魚比目魚味絕佳子初歸城內
外市廛殷富百貨雲連然無可游眺之處卽查氏水
西莊亦久廢矣

十一日河南幫船均已過竣其在天津北倉交卸保定
雄縣遷安霸州東安玉田良鄉固安寶坻九處兵米
船亦已到齊共一萬一千八百餘石畱原委運弁文陞候兌定

於明日押同幫船前進申刻管椒軒廉訪招飲椒
軒仍居運司署定於十三日交卸署極宏濶有池亭

花木之觀。余與椒軒亦自癸巳冬在都一別。彼時椒
軒官戶部郎。余已五年作郡。撫今追昔。感慨繫之。談
至更深而別。椒軒以連陽秋凱圖屬題。先是道光十
二年。湖南猺匪趙金隴。勾結廣東連州八排猺滋事。
椒軒從禧尙書公。恩瑚將軍。松額往討之。獲金隴。連
州猺就撫。繪圖以紀。爲題滿江紅一詞。蠢爾猺疆。
記曾費。天朝勦撫。問何人短衣躍馬參戎幕府。草
檄橫磨龍鼻盾。援枹親擊鼉鳴鼓。羨仙郎才調世無

雙兼文武。燕巢幕魚游釜。壺漿迓饒歌。譜看策勲。
殿上冠飄翠羽。笳鼓聲喧梅嶺月。旌旗影濕花田。
雨。倣淩煙寫入畫圖中。如親睹。接家書。知署中平。
安。

十二日。管叔軒王執軒暨天津縣俱來送。已刻行。城東
北角。卽三岔河北岸。有望海樓。

列聖幸天津。皆於此駐。

蹕行十餘里。泊紅橋。

仍天津地

橋下有河。

來瀝。乃西淀水也。與聯璧折回。登望海樓。飛甍聯互。

憑欄一眺極目青蒼樓後疊石爲山引水成沼惜久
未修葺鞠爲茂草矣山桃盛開折數枝而同到此
須登眺危樓傍水濱鶯聲三月節帆影兩河春日射
扶桑樹星躔析木津翠華猶在望鑾輅憶時巡
發家書

十三日以風急未能開舟

十四日辰刻行十餘里泊西沽仍天
津地舟中納姬客

况無聊三月時爲尋春色挂帆遲好從渡口迎桃葉

不向堤邊唱柳枝

近作楊柳枝詞

年紀合應憐碧玉因緣早

已繫紅絲定情自愧無釵合贈爾香奩一首詩薇堂

和曰輕舟小泊艷陽時沽水尋春正未遲明月卽當

初滿夜好花獨摘最高枝前緣合種藍田璧今夕欣

牽繡幕絲從此著書添侍史含情低詠定情詩晴皐

和曰到來恰是賞花時小駐征帆不覺遲大令江頭

渡桃葉香山洛下聘楊枝謫仙船好藏金屋少女風

柔絢色絲欲代催粧吟未就東君先有定情詩聯璧

和曰。正是雲英未嫁時。含葩養艷爲君遲。到來勝地
重三節。選得名花第一枝。鏡裡芙蓉窺艷質。堤邊楊
柳眉晴絲。畫眉約鬢郎君事。定減郵程數首詩。司筭
蔣箴和曰。撩人最是暮春時。爲訪名花放棹遲。何幸
蒹葭依玉樹。不須楊柳折空枝。年華聞道初加髻。綠
分從知暗繫絲。却扇吟成新句好。言情愛煞義山詩。
晴皐疊曰。汝南碧玉破瓜時。蓮步珊珊到未遲。淺黛
輕分楊柳色。小紅新試海棠枝。游仙恰引劉郎棹。償

聘何須織女絲他日徵蘭符吉夢裁箋載獻弄璋詩

十五日寅刻行五里過丁字沽

仍天
津地

未定子牙諸河之

水滙爲三角淀自南入運形如丁字故名又十餘里

過北倉

仍天
津地

是日風甚順揚帆直下共行八十里泊

楊村

楊村武清縣地距城三十里武清隸順天府

漢曰雍奴三角淀卽古雍奴水也四面有水曰雍不

流曰奴

楊村以上多暗灘糧艘至此必須起剝其

地設通判一員歲備剝船數千隻以待剝運河南幫

船均已陸續剝訖。徐前後兩幫，尙未過楊村也。未
飲卯時酒，已過丁字沽。春風巢燕子，春水渡雍奴。說
餅方抽麥，題糕不佩茱。楊村出糕乾糧艘方起剝，萬斛費
量珠。

十六日卯刻行，船屢擱淺，四十里泊南蔡村。仍武清地飯後

與幕中諸君子閒坐，各占俚語爲六言詩。余曰：遠看
摺扇一把，近看席篷一挂。若有巨靈大手，借他招涼
過夏。薇堂曰：遠看一個椰瓢，近看一隻輕舠。若貯詩

篇百首。送他海上飄飄。晴臯曰：遠看魚兒擺尾，近看
舵兒分水。若有萬丈絲綸，方許一鉤釣起。聯璧曰：遠
看一行飛雁，近看一條長緯。若教作字長空，也好寄
書鄉縣。連夕月光皎潔，波面浮金，清景可玩。

十七日卯刻行。水多淤淺，宛轉避之，不能速進。晨起微
雨，得句云：煙樹溟濛望不真，霏霏細雨灑如塵。波紋
誰刺團花繡，百萬金針露孔勻。四十里過河西務，
仍武清地。又十餘里，泊土門樓。香河縣地雨打篷窗，蕭蕭竟夜。

聽雨如夢令 點點暗和更漏好夢惺忪未就一

夜雨情濃愁煞嫩紅消受休驟休驟荳蔻含苞依舊

十八日卯刻行二十餘里見太行山遙青一抹掩映於

煙靄間眺望久之層氛西望鬱蒼蒼遙指煙巒是

太行雨戒山河分此脊

太行爲天下之脊

九州形勝扼其吭

雲飛雨捲藏仙境虎踞龍蟠拱帝鄉自別靈巖今

五載那禁拭目看嵐光又二十餘里過香河縣遇

雨少泊香河隸順天府古卽武清地也境內有大

小龍灣二水傳爲遼海運故道。薄暮又行十餘里。

泊甘露寺。

仍香河地

十九日卯刻行。河勢灣曲如往而復。又有三望蘇家樓

之意。三十里泊石槽。

通州地

廖運官託水司馬介紹。

欲列門牆。余愛其才不能却也。本日以詩爲贄。過舟修弟子禮。翰林門下而有干城之選。玉堂又添佳話矣。詩序曰。壽彭江左庸材。淮濱末弁。趨公鄴郡。得識荊州。猥承知遇之恩。久切追隨之願。繼讀袁簡齋太

史呈託師健中丞詩。淺子仰宮牆。六年不敢窺。自顧
螢末光。敢敵青陽輝。倘蒙衆人待。反失硜硜爲等句。
思才大如子才者。處貴賤之間。尙復如此。况赳赳一
武夫耶。孰意籠收藥石。惟良醫無棄材。履進圯橋。以
孺子爲可教。不遺封菲。許附朱監。忝列門墻。壽彭固
爲一時之幸。濫登瓦礫。夫子恐貽衆口之譏。謹賦蕪
篇。聊當執贄。詩曰。得傍龍門喜欲狂。感恩知己兩難
忘。不圖十六衙官隊。豫省十幫共重
空運官十六人竟附三千弟子。

行從此程門常立雪。居然由也許升堂。雄冠定惹儒
林誚。虔祝南豐一瓣香。三度操文柄。英才盡屬公。
慚非桃李質。亦備藥籠中。莫向同門說。須防鳴鼓攻。
扁舟流水上。日日坐春風。余和曰。抗顏莫笑退之
狂。好士真難每飯忘。愧我南車疎指引。屈君北面列
班行。迢迢煙水聯雙舸。彷彿琴書聚一堂。從此金蘭
堅夙契。風流常許接荀香。武庫推英俊。洵能敬爾
公。長鯨騰海上。俊鶻出雲中。巨響何辭叫。名材不待

攻扶搖看直上萬仞駕天風

二十日卯刻行十里過鄆縣馬頭鄆縣古爲鄆陰今廢併入通州馬頭距舊治十餘里早飯時偶談田齊君王后高齊顯祖事率成一絕巾幗鬚眉兩擅奇聰明天賦過人姿古來一副英雄手擊碎連環斬亂絲又二十餘里泊崔家樓仍通州地無風將十日矣抵崔家樓不過未申之交仍擬趲行狂飈忽作艤舟傍岸至夕不能解纜也又成一絕又聽空中畫角聲

雪花飛舞浪縱橫。風姨似惜臨歧別。特與詩人續舊盟。
題廖菊屏詩稿。曲折隨人意。生花筆一枝。置之才調集。
恰是性靈詩。宛轉情生處。淋漓興到時。挑燈吟不倦。
撚斷數莖髭。菊屏以詩謝曰。重疊瑤章。錫陽春白雪音。
拋磚時引玉。點石卽成金。屢作稱揚語。無非獎誘心。
南針蒙指示。從此更耽吟。

二十一日卯刻行。八里過小河口。

仍通州地

兌漕原在張家

灣。後移通州。今小河口。尙有通張家灣故道。又十餘

里忽起大風日色晦冥河水鼎沸泊至黃昏颶颶未

已距通州石壩

卸糧之所

僅十餘里竟不能到矣坐糧

廳齊約齋農部

承榮

余妻兄也差人來迓

二十二日卯刻行河水淺滯糧艘雲集乘隙而進午後

抵通州泊東岳廟前

通州漢爲潞縣唐曰元州金

曰通州今隸順天府白河潮河溫榆河諸水至此匯

爲潞河由天津入海東岳廟前有支河一道卽溫榆

水也各省漕糧挽運抵通由坐糧廳監督驗收轉運

京倉設倉場侍郎二員董其事。行役來千里。通津
第一州。地爲京左臂。路盡海東頭。細雨燕山樹。春風
潞水舟。天儲方待納。誰領富平侯。是日驗通州。
天津德左臨前四幫。隨驗隨收。辦理妥速。入城謁
倉督鐵仁山少司農。麟司農已卯翰林玉堂舊雨也。
拜坐糧廳承沛亭水部。霖暨齊約齋均以米色純潔
見譽。約齋畱午飯。劇談至晚。歸舟。求司馬來見。伊
先到二日。現已移寓客館。贈以詩曰。文章自昔有淵

源交誼休從宦海論。卅載科名推父執。與家君一

家沆瀣。溯師門。司馬爲秀楚循聲早種花。盈縣豪思

翹夫子堂弟

常教酒滿尊。百里豈堪容驥足。早移鶴蓋到梁園。

公餘常得奉周旋。贊治南牙近一年。江上琵琶吟白

傅。社中簫鼓祀朱仙。駐朱仙鎮歲寒久訂雷陳契。春暖同

乘李郭船。爲詠卬須懷雅誼。鴻泥畱証此時緣。

二十三日辰刻。約齋來拜。復過伊舟一叙。飯後。余入城

拜客。命僕輩收拾行具。移寓延壽庵。別所乘舟。

此是棲身安樂窩。住來不覺五旬過。前途又試輪蹄
鐵。擾擾紅塵可奈何。晤通州協太仁庵副鎮。平保

通州李萼亭刺史。宣範 州城有新舊之分。新城乃

拓舊城西面爲之。寓所在新城界內。歸寓行具俱已
移入廟宇整潔。後院有室三楹。可以安頓細小。承
沛亭李萼亭俱來拜。約齋以北漕防弊畧節見示。
甚透澈。錄之。畧曰。歷來驗卸米石。百弊叢生。而東豫
爲甚。緣東豫漕糧。係粟米麥豆三色。最易使水。故有

船上之米甚爲乾潔袋中之米忽致潮濕者皆驗後使水所致該船戶等祇知多出升合不顧利害而經紀等不但多圖使費并有以不起濕米爲無能者至於旗丁一船一名只能照管軍船何能兼顧剝船是以船戶代役交相舞弊習以爲常今擇其最關緊要者概舉數端預爲防範一驗米須臨艙打樣胥役等毋得參末議也向例坐糧廳驗米令舍人打樣挨艙呈驗應瞭應起取決于官倘稍假詞色或不臨艙簽

樣則混淆黑白。諸弊叢生。應於驗米時。嚴諭舍役等。臨船簽樣。靜聽吩咐。毋得顛預。亦毋得干預。一風晾米石。勿假手經紀舍役也。向例驗米。如有潮濕。卽飭弁丁認真風晾。隨乾隨起。若派人押晾。得遂所欲。卽以濕爲乾。不遂所欲。卽以乾爲濕。一經覆驗。則弁丁均受其累。應於驗米時。如有潮濕。不堪起卸者。除責懲船戶外。立飭弁丁趕緊風晾。以專責成。庶經紀舍役無所施其伎倆。一驗後須當日起完也。向例百家

經紀起米日行三萬石每家約起軍船一隻東豫軍船每隻不過四百餘石儘可一日起完無如該經紀代役等萬不肯當日起完畱其一半任聽船戶使水并有勒令使水者量水之多寡定費之輕重積弊相沿最堪痛恨應於驗後務令當日起完則船戶無使水工夫入袋之米可期乾潔一經紀呈樣斷不准多耽時日也向例經紀起米遇有潮濕准其呈樣但此中情弊難以概論有真係原來潮濕而呈樣者有經

紀代役勒索不遂而呈樣者有經紀代役通同使水因船戶使水過多而呈樣者及使費加足仍將濕米起去此等惡習歷任均受其欺朦應於驗米時親赴該經紀承起船上詳細查看如有潮濕立即稟明若延至次日始來呈樣者非勒索不遂即通同舞弊一概不准並治其有意耽延之罪庶呈樣之弊或可斂戢一上壩稽查必須嚴且勤也向例一廳驗米一廳上壩抽查過壩米石遇有升台短少米色潮濕者即

將經紀代役嚴行懲辦蓋所起濕米總俟本廳不在
壩時乘間偷過及至到橋霉變發熱不能進倉大受
其累應常在壩上或於裡河廳嚴密抽查遇有潮濕
立即出袋風晾嚴辦代役并治本經紀以用人不當
之罪以上五條均係北漕積弊爲害匪輕然而辦旗
丁易辦船戶難辦船戶易辦經紀難辦經紀易辦代
役難蓋旗丁尙知羞恥而船戶喪盡天良經紀尙有
身家而代役絕無顧忌故船戶雖無弊不作若代役

不肯起濕米。則船戶亦無從下手。船戶縱不敢舞弊。而代役勒令其使水。則船戶亦何樂不爲。祇須嚴辦代役。自然百弊皆除。尤在發軔之初。懲一警百。庶鬼蜮望風知畏。若因其初犯。稍事姑容。將覬覦漸生。紛紛效尤。害有不可勝言者。

二十四日辰刻。謁倉督王雲榭。

楚堂

少司農。

昨日白司京回通司

農與家君辛酉同年。叙世誼焉。申刻承沛亭齊約齋招飲。同席者永司馬暨山東總運官別駕。並聯

璧晴臯官別駕與沛亭亦屬內戚暢飲縱談毫無拘束亥正歸是日驗收臨後一幫

二十五日辰刻鐵仁山王雲榭兩司農俱來拜通永道

魏笛生觀察

茂林

自京公旋亦來拜余與笛生壬午

丙戌兩科同分會房癸巳入都復見於保陽郡署一別數年各道契濶午後回拜贈以詩曰兩度春闈共校讐保陽近復識荊州謁來潞水通新漕又向燕山續舊遊愧我南牙官寂寞感君東道誼綢繆正供次

第輪 天庾借作平原十日雷。是日登文昌閣閣

在東南隅城上。爲課土地通惠河之水。發源玉泉山建閘蓄之爲

轉運水路繞城而流。閣傍有軒三楹。可以眺遠。前坐糧廳

程蕉雲水部。川佑題聯曰。西接蓬萊會見三台超列

象。東連渤海底須百尺傲元龍。額曰。只談風月。余題

句曰。飛甍高壓女牆頭。傑閣登臨豁倦眸。千里暮雲

隨野盡。一灣春水抱城流。几窗瀟灑藏書舍。帆楫依

稀認客舟。西望長安真不遠。蓬萊宮闕是皇州。

東路廳何玉民司馬。耿繩歸自京亦來拜。

二十六日午刻相圃舍弟自京來自戊子歲弟以選拔銓授廣昌學博與余相別嗣因保舉離任領甲午鄉薦候試京華十載睽違一朝歡聚詩以誌喜雁序分飛已十年寒齋坐破廣文氊功名待向花封建姓字先從桂榜懸梁苑愧余官落拓燕臺憐爾客屯邇銜杯且叙天倫樂旅館春風棣萼聯潘芸閣學使本日按臨通州余與學使昔同提調史館昕夕過從

後於癸巳年入都一晤別來又經五載午後往拜暢
談數刻藉釋渴悰是日驗收平前一幫回拜何
玉民司馬

二十七日齊約齋約同聯璧相圃赴壩樓一眺凡漕糧

交卸後經紀裝入袋中以船

名曰弔載船

載至壩前用人

夫扛至裏河

即通惠河

又用船載至大通橋運入京倉樓

建於石壩上遙對盤山嵐光隱隱樓下人夫負重者
襁續不絕額題大觀樓聯曰天下供輸歸什一樓前

風月自無雙。又有前倉督莫實齋先生晉聯曰：天近
九重邊。檻外披雲迎日月。地臨萬戶上。檐前聚米作
山川。時承沛亭亦在樓中。談數刻。又與約齋泛舟襄
河。至八里橋。入岸上佛寺。海棠兩株。含苞欲吐。折數
枝。返棹而歸。得句云：無邊風景入憑欄。勝地登臨此
大觀。曲折河流環一帶。蒼茫山勢接千盤。遊仙客欲
騎鯨去。負米人同列雁看。餘興方酣歸未得。扁舟更
許泛晴瀾。入城天已黃昏。與約齋酒樓一叙。新豐

市上料無人識馬周也。歸後門人德琴南山自京

來謁琴南壬午春聞所得士現官刑部員外京察

一等未蒙記名糧運廳徐小如別駕鏞來拜

二十八日邀德琴南早飯是日驗收平後任城兩幫

二十九日齊小巖比部妻兄承彥自京來候題魏笛

生觀察溇陰補襖卷子道光乙未與張詩舲觀察在

文昌閣雅集團也卽詩舲所畫凌虛高閣俯城闔

襖事重修潞水濱三輔雄開京兆地一觴雅繼永和

春風前鶯語聯新約。雪上鴻泥証夙因。詎我轉輸來
已晚。可能添作卷中人。詩舲於昨日抵通。午後來
拜。

三十日辰刻回拜齊小巖。兩倉督請余與詩舲早飯。
笛生作陪。飯後回拜徐小如別駕。未晤。遂赴舟次。荅
詩舲拜。詩舲亦於天津納姬出見。麗人也。申刻永
司馬招飲。與官別駕廖菊屏邊聯壁同席。司馬出其
和作。並疊韻賀余納姬。和曰。早欽家學有淵源。交契

欣從孔李論日下文章推巨手河間禮樂是專門趨
公久聽南衙鼓好客常開北海尊愧我樗材叨世末
幸隨冠蓋到梁園輶車計日賦言旋輸貢勤勞閱
半年入覲定知蒙上考此行真不愧登仙往來桑
梓還鄉錦騰蹕功名下水船載誦瑤章慚郢和好畱
鴻爪記良緣疊日醴泉莫漫誚無源才德堪同絡秀
論使者輝光臨潞水美人顏色艷津門聘錢自有珠
盈斛逌宴同傾酒滿尊折取一枝春意好早教渴病

慰文園 香衾午夜費周旋。小謫紅塵十六年。天下
有情都眷屬。洛中名宦卽神仙。芳隣巧結芝蘭契。同
夢常牽書畫船。願向氤氲酬大使。赤繩爲結好因緣。
是日驗收徐前一幫。相圃回京。因初一日在部
投供也。接家書知河南於三月十二日得透雨。
四月初一日辰刻詣倉場衙門公謁。差人赴各衙門道
賀。是日驗收徐後一幫。魏笛生以所選三朝玉
尺文式見贈。聯璧進京尋寓所。

初二日徐後幫有數船米豆稍帶潮濕限三日風晾

題魏笛生兼葭閣小集圖 昔我客長安閣中常徙

倚白露望蒼蒼秋在蘆花裏舊夢隔春明十有餘年

矣今窺尺幅中恍如躡屐齒壇坫盛一時魚雅諸君

子作記倣西園推君執牛耳龍樹記前蹤爪痕猶在

紙

閣畔有龍爪槐一株顧晴芬侍郎題寺門曰龍樹院

我今思轉輸行當遊

帝里勝地訪城南載酒頻來此蘆芽滿地生河水清

瀾瀾東望潞城隈思逐兼葭起 珠江送別圖 憶

昔同爲侍從臣，嶺南曾步後車塵。卽今潞水停舟日，
又見珠江返棹人。祖席艷邀花埭月，友聲情戀穗城
春。愧余漫寫郵程記，余有使粵日記紀事何如畫裏真。水
繪園讀書圖。水邊繪出讀書聲，借榻名園養翮成。
黃卷青燈情似昨，春風回首雉臯城。前有巢民後
有君，名山事業要平分。陳髯空賦梅花句，只向筵前
乞紫雲。晚間邀齊約齋永，雲樵廖菊屏及薇堂晴
臯小集。

初三日。以漕糧卽日交竣。諸臻妥協。同永司馬傅十幫運官。在文昌閣午飯。聯璧歸自京。賃寓石頭衙衙。

萬升店。候補倉監督姚玉峯比部。文璐來拜。

初四日。永司馬親赴徐後幫督同風涼。晚間呈樣米豆均已乾燥。承沛亭齊約齋請余與詩舲在文昌閣午飯。笛生作陪。酉正散。同拜姚玉峯比部。

初五日。魏笛生復於文昌閣。邀余與詩舲一叙。同席者。承沛亭齊約齋太仁庵何玉民徐小如李夢亭也。拇

戰甚譁。修爵無算。戊正散。余出扇屬詩。舲寫圖以紀。
是日徐後幫收訖。

初六日。報明全漕兌竣。並於倉場請赴部引見。咨文。

因候咨尙需數日。廖菊屏同山東濟左幫楊運官。

懋和

請余與詩舲暨永司馬赴昌平州遊明陵。明十三陵
在州西北天壽山。成祖長陵。仁宗獻陵。宣宗景陵。英
宗裕陵。憲宗茂陵。孝宗泰陵。武宗康陵。世宗永陵。穆
宗昭陵。神宗定陵。光宗慶陵。熹宗德陵。莊烈帝思陵。

本年 翠華臨幸親祭五陵則長陵獻陵景陵泰陵
永陵也 卯刻與聯璧晴臯同行二十里東壩茶尖
又五十里沙河尖菊屏在此相候遇詩舫及其友莊
師劍茂才景賢沙河舊爲縣治今廢北路廳駐此

又二十里抵昌平寓城內西大街客店 昌平古
曰燕平今隸順天府霸昌道駐此地居京師正北距
居庸關四十里故重鎮也今城池鞏固而市井蕭條
矣 唐狄仁傑爲昌平令有老媪訴虎害其子仁傑

移檄於神虎自伏罪。漢寇恂州人爲潁川守移汝南父老詣闕請曰願借寇君一年唐劉蕡亦州人應賢良科極言宦寺之禍考官歎服而不敢收李邵曰劉蕡下第我輩登科能無顏厚

初七日卯刻與諸同人出西門行八里許卽見長陵山勢三面環抱形如椅圈氣象雄壯先過石坊五里許入大紅門又三里許至聖德神功碑亭龍首龜趺穹然矗立文不及遍覽款爲洪熙元年四月十七日孝

子嗣皇帝高熾謹述我

高宗純皇帝於乾隆五十年重修明陵 御製哀明陵七言詩

三十韻勒於碑陰其左右旁面則鐫乾隆五十二年

暨嘉慶九年 御製詩文也亭四角有華表四

俗名思君

出望過此爲像生石器四獅四豸四駝四象四麟四

馬十二文武職官軀幹雄偉雕鏤精緻而每具各有

殘缺又過石坊二里許有山河一道源出山西北九

龍池河身寬濶現止細流水盛時當極浩瀚也石梁

傾圯渡梁七八里山勢漸高迤邐而登乃至陵外大
門繚以周垣重門五楹曰祿恩門甯窅宏深白石欄
楯門內兩墀寬坦松柏森然享殿九楹曰祿恩殿重
檐四翼陞栳三重殿內甃以卓面青石其光可鑑楠
木柱合抱不交中爲寶座供成祖文皇帝木主殿左
墀有碑亭刻順治二年禁止樵蘇上諭一道碑陰
刻乾隆五十二年御製七言詩二章左旁刻嘉慶
九年御製七言長律詩一首殿後又一重門內爲

碑樓顏曰長陵碑高兩丈許以昌化石爲之題曰大明成祖文皇帝之陵樓後爲寶城周圍三里寶頂高出城上登樓一眺松柏滿山葱葱鬱鬱諸陵東西相望宛在目前延佇久之東至景陵永陵又東爲德陵以路險不能入回至長陵早飯詩舲與其友莊君因力倦與楊運官先回余與永司馬聯璧晴皐菊屏西至獻陵慶陵裕陵茂陵泰陵又西爲康陵以路遠不能至循山而南至定陵昭陵已近河干諸陵較長陵

具體而微。惟永陵定陵。規制相埒。周垣之外。並加重垣。永陵寶城埽口。以文石爲之。尤爲華侈。今重垣已圯。殿宇俱經改作。尙屬完整。本年所祭五陵。裝飾一新。朝廷優禮前代。實屬有加無已。諸陵門外。各有豐碑一座。似爲紀功德而設。而俱不着一字。殊不可解。如以爲大莫能名。何長陵又有聖德神功之頌。豈不自相矛盾耶。且諸陵俱無石器。蓋其地專以葬長陵。故規模極爲宏遠。其後仁宣崇儉。祔葬陵旁。繼體

諸君亦遂因而不改。是以陵前儀制均若統於一尊。若其祔葬之次。以昭穆而論。獻陵應在長陵之東。景陵應在長陵之西。以下遞爲左右。今俱不然。且定陵躋於昭陵之上。慶陵又躋於獻陵裕陵之間。不論世次。但就吉穴。蓋篤信青烏家說耳。過河七里許。經萬貴妃園寢。乃至思陵。陵本田貴妃園寢。故距諸陵甚遠。蓋思陵在日。並未自營吉地。迨殉國後。昌平州吏目趙一桂。卽啟妃攢。以葬帝后梓宮。本朝始爲建

陵殿宇寶城一如諸陵之制。殊恩異數曠古所無。門外碑亭乃順治十六年大學士金之俊奉勅撰文。極爲惋惜。陵右側爲殉節司禮監王承恩之墓。短墻四蔽。封樹儼然。門內有碑。載順治二年諭祭文。外又有碑。載順治十六年諭祭文。宸章疊錫。慨念孤忠。承恩不死矣。歸路率成一律。以紀游蹤。珠邱長閟。萬年燈。勝國神靈。此式憑屋。社俄經二百載。履闌遍訪十三陵。河山尙控幽燕壯。文獻難從杞宋徵。

聞道 鑾輿親酌奠松楸一色 湛恩承 晚間菊
屏等設飲藏闔拇戰賓主皆酣

初八日寅刻行二十里沙河尖又二十五里過立水橋
入僧寺一茶又二十五里東壩尖又二十里回抵通
州 兩倉督於是日回京將於初十日奏豫東兩省
全漕完竣也

初九日齊約齋過訪知引 見咨文可由倉場徑咨吏
部毋庸候領因將搭運兵米畱永司馬在通候兌檢

點行具定於十一日進京

初十日辭行。晚間永司馬在余寓邀張詩舲齊約齋暨官別駕便酌。

十一日辰刻守土諸君俱來送。何玉民司馬以其先德

蘭士先生

道生

詩稿見贈。

齊約齋餞余與詩舲暨

永司馬官別駕於壩樓。承浦亭陪席間。詩舲述前坐

糧廳程蕉雲水部所題樓上對聯頗工。

作而識之未懸

高處不勝寒。溯沙鳥風帆七十二。沽丁字水夕陽無

限好對燕雲薊樹百千萬疊米家山未刻行四十

里抵京薇堂晴臯聯壁先已到寓蓮舫舍弟亦於是

日抵京同寓者江西廬陵縣鹿進軒

傳先

明府也

征衫又染帝京塵回首鴻泥感夙因桐葉紀年經

再閨荆花含笑恰三人重編此日春明錄誰識當時

侍從臣慚愧不才蒙薦稱也隨計吏覲

丹宸